

# *Pungutan 10 pingat dalam acara ujian Sukan SEA pembakar semangat pesilat SG*



► ZULAIQAH ABDUL RAHIM  
zulabr@sph.com.sg

PASUKAN silat Singapura bakal menunjukkan taring mereka pada Sukan SEA Disember ini ekoran berjaya memungut dua pingat emas, enam pingat perak dan dua pingat gangsa dalam Kejohanan Pencak Silat Sultan Asia Tenggara sulung yang diadakan di Manila, Filipina, semalam.

Kejohanan selama tiga hari itu disertai empat lagi negara Asean – Indonesia, Filipina, Thailand dan Brunei.

Ia merupakan acara ujian sebelum berlangsungnya temasya sukan dwitahunan yang ke-30 itu pada Disember ini di Filipina.

Keseluruhannya, Singapura mengakhiri kejohanan itu di tempat kedua di belakang Indonesia yang meraih lima pingat emas, tiga pingat perak dan satu pingat gangsa.

Ketua Pegawai Eksekutif (CEO) Persekutuan Silat Singapura (Persisi), Sheikh Alau'ddin Yacoob Marican, mengulas mengenai persembahan anak buahnya dalam kejohanan tersebut.

“Bagi saya, keputusan ini menunjukkan perkembangan serta pertumbuhan atlet kami menjelang Sukan SEA nanti,” katanya.

Pingat emas yang diraih dalam kejohanan itu hasil kemenangan dalam acara Seni Tunggal Puteri yang dimenangi Nurzuhairah Mohd Yazid dan acara Seni Pasukan Putera menerusi gabungan Nujaid Hasif Zainal Abidin, Muhammad Nazrul Mohd Kamal dan Hamillatu Arash Juffrie.

Singapura terpaksa berpuas hati dengan pingat perak dalam enam acara lain – dua acara Seni dan empat acara Tanding.

Acara Seni itu adalah Seni Ganda Putera yang dipersembahkan oleh Nur Hakim Norshamsuddin dan Syafiq Syazry Mohd Abdul Majid dan Seni Pasukan Puteri hasil usaha srikandi trio Nurzuhairah Mohd Yazid, Nur Azlyana Ismail dan Siti Nazurah Md Yusoff.

Bagi acara Tanding pula, Atiq Syazwani Roslan (Kelas ‘A’ Puteri), Muhammad Aiman Mohamad Juma’at (Kelas ‘A’ Putera) dan Muhammad Riansyaugi Mistam (Kelas ‘D’ Putera) gagal mengalahkan lawan masing-masing dan mengakhiri kejohanan sebagai naib johan.

Ini termasuk Muhammad Hazim Mohd Yusli yang bersaing dalam acara Tanding Kelas ‘B’ Putera.

Namun, perwira negara itu terlepas peluang merebut takhta dalam perlawanan akhir menentang Hidayat Limonu dari Indonesia disebabkan kecederaan pada tapak kakinya.

Nurul Suhaila Mohamed Saiful dan Muhammad Iqbal Abdul Rahman melengkapkan pungutan pasukan negara dengan meraih pingat gangsa dalam acara masing-masing, Seni Tunggal Putera dan Tanding Kelas ‘B’ Puteri.

“Namun, ada juga atlet seperti Suhaila yang harus bekerja lebih keras dan menaikkan berat badannya. Dia yang selalunya beraksi dalam acara Tanding Kelas ‘D’ Puteri (60 kilogram hingga 65 kilogram) kini bersaing dalam Kelas ‘B’ Puteri (50 kilogram hingga 55 kilogram).

“Bagi atlet baru lain yang kali pertama akan membuat penampilan pada Sukan SEA, kejohanan ini merupakan satu latihan baik buat mereka,” kata Sheikh Alau'ddin.

Dalam edisi Sukan SEA 2017 di Kuala Lumpur, Singapura membawa pulang dua pingat emas, empat pingat perak dan enam pingat gangsa.

**BINA MOMENTUM:** Pasukan silat Singapura memungut dua pingat emas, enam pingat perak dan dua pingat gangsa pada Kejohanan Pencak Silat Sultan Asia Tenggara di Manila, Filipina, semalam. Kejohanan itu merupakan acara ujian sebelum berlangsungnya Sukan SEA Disember ini di Filipina. – Foto PERSEKUTUAN SILAT SINGAPURA